

جهاد زيادة

ضغط على

أشعار بالعامية المصرية

الطبعة الأولى مايو 2018

## بطاقة الكتاب

- عنوان المؤلف : ضغط عالي  
المؤلفة : عزة على عبد الحميد  
إسم الشهرة : جهاد زيادة  
التصنيف : أشعار بالعامية المصرية  
رقم الإيداع : 2018-11177  
الترقيم الدولي : 978-977-6656-15-4  
عدد الصفحات : 102 صفحة  
رقم الإصدار الداخلي : 192 – الطبعة الأولى مايو 2018  
تصميم الغلاف والتنسيق : د. محروس عتاقى  
جميع حقوق الطبع والنشر محفوظة للشاعر، ولا يحق لأى دار نشر  
طبع ونشر وتوزيع الكتاب الا بموافقة كتابية وموثقة من الشاعر

### دار النيل والفرات للنشر والتوزيع

ثورة مصرية تشرق إبداعا على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 – سجل تجاري: 13242 / 2017 – بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 – 01116202218 – 01202541192 تليفاكس: 020554372901

البريد الإلكتروني: [alnilwaalfourat@gmail.com](mailto:alnilwaalfourat@gmail.com) [alnilwaalfourat](https://www.facebook.com/alnilwaalfourat) [alnilwaalfourat](https://www.instagram.com/alnilwaalfourat)

المنزل الرئيسي: ج.م.م. محافظة الشرقية – العاشر من رمضان – مجاورة 13 – أمام سنتر الـ13 – عقار 304

## ضغط على

### صفحة بالعامية المصرية على وجه الوضع الراهن

---

الشاعرة جهاد زيادة - رغم حمية ثورتها الشعرية - هادئة جدا ، تتفاعل مع المشهد اليومي انطلاقا من واقعيها الرمزية فتعكس الحاضر على مرآة المستقبل غير غافلة عن الماضي الذي أنهكته ترميزا واسقاطا على حاضرها ، لها قاموسها الخاص ومفرداتها - المتكررة - على اختلاف استخداماتها في بنية النص صعودا أو هبوطا كما تقتضى فلسفة البناء ، تستخدم الفلاش باك كثيرا موغلة في أعماق الماضي ، وتقترب من الميثولوجيا على استحياء لإنها شاعرة متفردة تعي ما تقول ، وتكتب نفسها ، صنعت جدلية جديدة في العشق المعقول من نقائص جنون قيس وعناد عنتره وغفلة روميو وفي المقابل ألقت برد فعل استكانة عبلة وغيبة ليلي وجنون جوليت طى النسيان وصنعت مزجا جديدة تؤسس له جهاد زيادة ، ثم ألبسته ثوب الوطنية والانتماء مستخدمة الترميز كثيرا ، والتقرير أحيانا ، والضبابية نادرا

وفي النهاية نخرج بديوان رائع وكسب جديد للمكتبة العربية

الشاعر الناقد

ناجى عبد المنعم

## إهداء

اهدي ديواني الثاني الى أولادي الذين آزروني و تحملوا  
بعدي عنهم لساعات حملي في كلماتي .. و حتى ساعات  
المخاض ..

كما اهديه الى الرجل الذي طالما وقف بجانبى وساندى  
وقوى عزيمتى.. رفيق طفولتى و صديق شبابى ..

زوجى الحبيب

أهديكم مولودى الثانى راجية من الله ان ينال القبول

## جهاد زيادة

## ضغط عالي

يقول الناس . انك خنت عهدي

و برضه مسكت ف خيالي

و كتفت الهوى ف قلبي

و كنت بشوف ف أحلامي

عيونك ليا تخذعني

أكذب نفسي واتألم

والم الباقي من روعي

و اخللي مشاعري تجمعني

دا مين قال الهوى منك

فرح و سرور

و مين شاف اني مبسوطه

و مين قال ان بعدك نور

انا وياك كذا إحساس  
مخبيني انا جواك  
و لامعنى مقضييني  
انا جنبك يادوب زفرات  
و كل حواسي علشاني  
يادوب سكرات  
يعيش الحب لو يعني  
رضيت له يعيش  
يموت الحب بالسكته  
و يقتل قلبي 100 قاتله  
و تتحول مسار الكون  
هوا و تحابيش  
و قالوا هواك  
بيسكن كل يوم واحده

أنا واحده  
و لا عمري لقيتني معاك  
حياتي هعيش  
بتظلمني و تتكبر  
و لا بتعذر و لا تقدر  
و اقول معلى  
ماهو حبي اللي صور لك  
وجودي مفيش  
كلام ياالما و كدبته  
و عشت اتلوى و بداري  
بدال اليوم سنين كامله  
و قلبي ياما حولته  
و شكي باحولته ف حبك  
هنا و بعيش

ربطت دماغى ع الفكره  
و عشت الحب بالفطره  
و اخدت اقراص تصبرنى  
سهرت من الوجع الالى  
و كبست الجراح تانى  
رضيت لك اكون غطا من ريش  
و بتكفر ف أيامى  
و مر حياتى يحلالى  
و اقول يمكن  
يحس معايا بالتقصير  
و يعرف قد ايه غالى  
و يعرف قد ايه قلبى  
بيتعشم معاه و يغير  
اتارى القصه خداعه من الاول

و كدبه بيحسنه وحسنه  
معاه طول  
و برضه القلب ما اتحول  
و رخص ضحكتي الغالي  
و خلاني كما المهابيل  
بنف الم ف الفاضي  
و اصبه بهبلي ع المنيان  
لا انا شايفه  
و لا حتى الهوى عميان  
قالوا لي كتير  
مفيش فايده هواه أصله  
نيران قايدة  
و دقت معاه العذاب ألوان  
و كدبت الحكاوي كمان

فكان بيبيع ف إحساسي

و عامل رفته مزايده

و الأونا و مين داخل

حياته فيها مية داخله

و ناس خارجه

و ناس داخله

واكثر سكته مداخل

لكن كفيت

معدتش قادرة ع التحصيل

و لا كيتوفان

مضيع نص اوجاعي

و لا حتى صداع القلب

بيسيني

شربت ف كركديه ساقع

وصل بالفكر للذروة  
فجبت الدوم  
و بلّيته  
حفظت ف قلبي بلّيته  
شربت الكاس  
و هديته  
لكن صمم يموت مني  
و أعلن انه بيعاني  
ف باسم الله  
نوبنا الموت على الفرقه  
و مش فارقه  
يكون البعد للميت  
مادام الضغط من بعدك  
صبح عالي

## حب يتيم

من الجايز

تكون الماضي و الحاضر

لكنه أليم

يجوز جدا

براحة بالننا بالخاطر

و لا بيخطر على الخاطر

بان هوانا من صغره

شعوره هشيم

يجوز كنا يجوز هنا

يجوز البيعه مش خالصه

و لما حلفنا ع الاخلاص

يمينا كان كما الدخان

بصورة باهته شوشنا

فكان الناتج الخسران  
بنتأمر على قلوبنا  
ف وسط معالم الذكرى  
فتصبح فكره مقتوله  
تعيش لكن تعيش نكرة  
تصب الدم ف الشريان  
عشان ينجب ألم ساخر  
بيسخر حتى من يومنا  
فينتج م الوجع فاخر  
و علمنا ان بكرة عقيم  
حاولنا نخلف الاحلام  
فجات للدنيا معيوبه  
عشان اصل النسب متهان  
سواد الليل ماهوش ناقص

سواد منه  
سواده ضلته فاحت  
فكان كل السواد منا  
و ضللنا هوانا بعند  
فضلينا و ضللنا  
و روحنا نداري ع الضحكه  
فبعثت للدموع رنه  
ف خلينا الدفا بردان  
و خلينا بخطوط سيرنا  
و قلب رسمته ع الجدران  
نزف منا  
و حرف كتبته كان يا ما كان  
و لا اعرفش انه حرف غشيم  
خساره بجد صدقته

و كان الناهي .. آمنته  
صحيح صدق اللي قال انه  
ايادي البخل ماتبرش  
بقلب يتيم

زهايمر

كنت باعمل نفسي عادي  
و اجري و ابعده غصب عني  
كنت بستناك تنادي  
كنت رغم البعد. مني  
كنت باضحك..  
لما تتنرفز و تعلن  
اننا يعني انتهيينا  
كل مرة نقول فراق  
قولنا للعند استيينا  
بعد ثانيه من البعاد  
ننسى أصلا ليه ابتدينا  
كنا نبعده بالأمانى  
تسهر الاحلام تعاني  
نقتل الفرحة ف ثواني

يفرحوا فينا الأعداي  
كنت اعادي اي كلمه  
لو تشاور يوم عليك  
كنت بزعل من عينيا  
لما توحشهم عينيك  
كنت احفظ نفسي دايمًا  
حبه اصله مكانش ليا  
خطوتين ابعده و اكمل  
انت ويا الكبر تهمل  
و انت رغم الظلم بادي  
اجري و اهرج مرتين  
بس صورتك جوه عيني  
وانسى نفسي جوه منك  
اكتب الايام و ادور

النهارده اسمه ايه ؟  
يوم فراقنا كان يوم ايه ؟  
طب خصامنا اصله ليه ؟  
طب عيوني بعد بعدك  
لسه لونها زي ما هو  
ولا لونها راح عليه  
الليالي هي هي  
لسه برضو الليل بييجي  
لسه نجم البدر هادي ؟  
فجأة تخطفني الاجابه  
انت رغم خصامنا فيا  
اما انا صابني الزهايمر

## مدد

ازاي تكون انت الحكايه و شكلها

حتى العينين مرسومه من نور ضلها  
ازاي تشكل ف الحروف ..  
فتبان معاك الكلمه موجوده انما مكتتفه  
بيعاني جدا سطر احساسك بها  
ازاي لها  
و انت البدايه لكل الوان التشتت كلها  
متفرقين كل المعاني ع السكك  
المعنى ده بيشتحت امل  
و المعنى ده شارح وجع  
و المعنى ده طالب دفا  
بينادي كل المفردات  
فتبان خطاه مستعطفه  
تعبان قوي منك أنا  
باشكيك لروحي فاتوجع

ف تلوم عليا ارجع بلطش ف الحيطان  
مش شايف الدمعه انما  
بترجى فيها خلاص كفى  
ماشى ضرير السطر  
باتمختر ف سكر و عربده  
مستعبده فيا الكلام  
فتلف ترميني بكسور  
مسحور شعوري بينتظر  
لحظة شفا  
ياا أم كل المفردات  
يا عابده  
و حياة جناب كل اللي جاب  
معاني شاردة و زاهدة  
سابق عليكى الفكره تيجي يا سيدة

و تسلفيني كلمتين  
ندرن عليا يا ستنا  
ان جيتي حتى بالألم متشده  
لاقيد لك السطرين شموع  
من جوه عيني كحلها  
ياك حلها من نظرتك  
مددد يا ظاهره و 100 مددد . .

## مش عيوني

كلمه عنك مش هقولها  
اصل كل كلامي مات

انت فاكر لما تجرح !  
قلبي بينن ف سكات ؟  
و لا فاكر لما تقسى  
تنحني مني الآهات  
حد قالك عن مشاعري  
توب حديد  
حد صور لك دموعي  
ضحكه تايهه  
دايره بتلف الوريد  
و لا فاكر دق قلبي  
شريط تعدي عليه تعدي  
يشبه السكه الحديد  
قبل ما تلوم الليالي  
لوم كمان ع الذكريات

حدد الخط اللي ساري  
جوه مني بشوق وليد  
دوسه أكثر مش هعاني  
حد شاف ميت عنيد !  
جوه قبيري مني ليك  
لابسه لكن  
للكفن أقرب أكيد  
باتكسر بس بثبات  
مش عيوني بس شايفه  
مش حواسي بس عايشه  
لسه جوه عينيك ببات  
مش مشاعر  
بس حساك من جديد  
كل موته جوه مني

تندفن من ثاني فيك  
كل ثانيه فيك بموت  
يتولد إحساسي بيك  
اجري و انده ع الأمانى  
تتخرس أيامي ثاني  
اتوجع وياك و اعاني  
ارجع الأحلام ثواني  
و احضن الحلم ف ساعات

## الكل خان

الكل خان الكل باع  
ضاع الأمان من دنيتي  
سلمت قلبي لحد كان

مفروض يبدد وحدتي  
رسمت قلب علي الحيطان  
مرشوق ف سهم ينصصه  
طلعت سهام الغدر  
راشقه في جتتي  
غربان بتتهش ف الحيا  
منعوا الحيا من جوه عينهم  
غربوني ف سكتي  
اصحابي كانوا!!  
و لا كانوا قلوب عدا  
متركبه لعدة وشوش  
بيحطوا سم ف لقمتي  
مية عينيهم كات حياه  
بس الحياه

منعت هواها استنشقه  
فاتحوّلت كلمة حياتي  
أصبحت...  
كنا زماااااااااان  
و اليوم بقيت  
أنا علامة استفهام؟؟

## كل مرة . . .

كل مرة اقول و ماله  
و انسى جرحه  
يبقى هم الليل و باله  
وابقى طول العمر فرحه

كل ماله ببعد اكر  
و ابقى شاله  
و اما بسأل ليه ببقدر  
السكوت ببطول ف شرحه  
حبتين و البعد زاد  
مره يخلف ف الميعاد  
مره يتحجج بحاله  
مره تاتيه الفكر دابحه

## مجبور

مجبور يا حرف الإختيار  
ملناش خيار  
غير كتم صرخه الانتحار  
محروم تقول ع البعد نار  
مجبور لضحكه مدمعه

مجبور لبسماه مولعه

مجبور تموت

و القبر مرسوم بين عينيك

مكتوب تعيش

و الدنيا تترحم عليك

## بوصيكي

اضحكي وقت اما يضحك

و اسرحي ف حرفه اللي باكي

لو خياله ف مره يسرح

اسرحي

لو جنونه ف مره يصرخ

صرخي

طبطني بايدك كمان  
اوعي تنسي تطبطني  
ازعلي منه و عليه  
املي كل الكون حنان  
و بحنانك رطبي  
اكتبي حرفك عليه  
اي حرف يجيكي غيره  
امسحيه و لا اشطبي  
مجلي دايماف حرفه  
و ابكي دايماف وقت ضعفه  
و افرحي وقت اما يفرح  
اوعي مرة تفكره  
حتى بعيوني  
و ان حاولتي تجيبي سيرتي

فكريه بأيام جنوني  
اوعى مره تقولي انى  
ياما صنته  
او نسيت  
الكون ده كله عشانه بعته  
اوعى مره تفكريه بدموع عينيا  
اللى سهرت له بتدعى  
لما كان تعبان شويه  
اوعى لما يشوف حروفي  
اللى كانت له عليه  
و اللى كانت لما يضحك  
تبتسم من شوقى ليه  
و لا احساسى اللى مات  
ف البعد عنه

و لا حساد الغرام  
و الكلام عني وعنه  
تغلطي و تقولي شوفه  
لو حلف لك مية يمين  
ان عينك جواه جين  
صدقيه

اوعي مرة تكديبه  
لو باهمالك رماكي  
اتحمليه

لما يتعصب معاكي  
و لا يوم خيب دعاكي  
و لا هدد فيه رجاكي  
برضه منه استحمليه  
لما يتحجج بشغله

و لا يستنفذ ظروفه  
لما تيجي تكلميه  
دوغري يتداری ف كسوفه  
يرمي كل اللوم عليكي  
لما يلقي عيون بديله  
كملي معاه المسيره  
اشغلي حبك بخوفه  
لما يسكت وقت فرحك  
و اما يتبسم ف جرحك  
قولي اصلي بحب خوفه  
اوعى تنسي تدلعيه  
يعني لما يقول بحبك  
قولي مية مليون آمين  
لما يتغزل ف قدك

قولي ده من الصادقين

لما يبعد رغم شوقك

للحنين

لما تكتشفي انه خاين

او عي يوم مرة تخونيه

## آخر قراار

مش قلت لك متصدقيش

لو تاني قامت ثورتي

و تضغطيني بكلمتين

ملهومش معنى ف اللغه

مش قلت لك

لو مره هنتي ف لحظه طارئه

ابقي اصبري

انا اصلي مش طينة بشر  
انا طينتي من حب افهمي  
بتكسريني جوه منك بالغبا  
يعني اما تلقي حاجه مني  
بتعترف انك بقيتي بره عني  
و الحياه من بعد منك  
سيرة الحب العلي  
استغفري كدااااب انا  
و المفترى  
و انتي حبيبتى  
النور لعيني و طلتك  
سيدنا الولي ..

----- ه -----

طب هو ينفع

اني اكون لك لحظتين  
يعني اما تبقى  
النور لقلبي بكلمه تيجي تضلمه  
تسرح على كل الغيطان  
تبدر فرح  
و عند زرعي تولعه  
معقول تكون  
الفرحة لعيوني و هنا  
تقلع قلوب  
الضحكه تسقط من علي  
معقول خضار القلب بيشقق لنا  
بعد اما كانت ضحكته  
بتورد الخد و حلي  
معقول شقايق قسوتك

ملهومش عيلتين م الحنين  
طب أب يشرح وجهتك  
او ام تسأل ليه شرودك  
عن عيوني ف عز وقت محبتك

----- ه -----

خليكي مره ف مطرحي  
و اديني قسطين من براح  
هو انتي ليه بتحددي  
و تكلمي البعد بجراح  
مية الف نوبه قلت لك  
متكلميش السعي فوق قلبي بمرار  
متلوعيش الصبر  
خللي الصبر صابر ف انتظار  
ممشيتش لكن سيبت لك



انا قصدي ببعدى ابدل بس  
اللى ف بالك كان كل امالى  
تشوف بخيالى ازاي ف البعد  
هتبقى الاقرب و الغالى  
ما تقولش انا بعت  
انا كل حياتي من الاول  
و لحد الاخر عايشالك  
فان كنت هجرت  
و سيبت القلب  
انا قلبي بيتمنى وصالك  
ما تقولش انا بعت  
عشان لو عيدت كلامي  
هتعرف قصدي انا لك  
انا مهما بعدت

هتفضل دايمًا  
جوه عيوني و بصالك ..

## ذنب مين

يعني تقتل حبي فيا  
ثم تترحم عليا  
هو موت القلب عندك  
شيء متتعذبش بيه  
كنت لما هدرت دمي  
قبل ما تكمل تسمي  
يعني اناااا لو كنت يعني  
جزء منك فيك سامعني  
لسه احساسك واجعني

يبقى بعد الموت ف حبك  
لسه مني باقيلي ايه  
كنت فكر و انت ماشي  
ان قتل الروح حرام  
و ان بعض الهجر قاسي  
و ان كل الشوق غرام  
من جرام حبة مودة  
خمسه منه حنان و هرضى  
حبه من ده و حبه من ده  
حتى لو كان كل مده  
مش تقول عنه انه رده  
ياللي بتبدل ف جرحي  
انت تمشي وهو فيا  
الف عام

كنت فكر مره تنسى  
وابعت الاشواق سلام  
كان ما بينا حب و لا  
كل شيء ف القلب ولى  
و المعاني اللي ف قلوبنا  
كات كلالام  
ذنب هجرانك له ديه  
لو هتدفع من عينيا  
بس رجع روعي ليا  
هتلاقيني نسيت أوام  
بعد منك ايه باقيلي  
غربه بتغرب سنيني  
و الربيع كان بيك ف ليلى  
كنت بستناك تجيلي

كل ليله ف المنام  
الخريف بقى لون ربيعي  
كنت شاريه و قلت بيعي  
و المنام اصبح ملاالم  
كل مره اقول و ماله  
ما احنا نصين و السلام  
ليه حاربت النبض لبيبيه  
انتصر عندك و عندي  
و الفراق كملها عندي  
نسيتني فيه  
كان ذنب ميبين ???

## شريان العند

من موقع صورتك

جوه الجرح

شمال النبض

يمين الشريان

اللي بينزف بيك

حضرة معاليك

اليوم الخامس

بعد الساعة ثمانية الصبح

يدق القلب و ينده ليك

تتفرز جدا اوردتي

و تبطل ضخ  
و كراتي الحمرا بتتبدل  
و بتقتل ف كراتي البيضا  
وتحاييل ف اورطي معاند  
يمكن يتهد  
فتشاور لدعامه قلبي  
تتلم عن الكبر شويه  
و تبطل جلد  
اليوم السادس  
الساعه تمانيه  
و من داخل نفس التوقيت  
الليل بيغرق ف صباحه  
و بينصب فخ  
و الدم الحالف ما يفارق

بيللم داخلى شريانك  
ف شعور مش صح  
صحصح لي  
السيتوبلازم الكائن  
جوه حروف الاسم  
انا ميت فيك  
انما ميت من جوه النزف  
و برغم الموت المتداري  
جوه الاحساس  
مش قادره ينبض القلب  
ابطل عزف  
في اليوم الرابع  
قبل ما نكتب لحظة حذف  
انا فيا بعدت

كملت النفس الخارج مني  
بكل العند فينادي القلب  
بشكل مخالف كل الوصف  
انك بتحب  
فازاي بتعاند كل الوقت  
وتنسى ف كل ساعات البعد  
احيانا عشنا ثواني الفرحة . . .

## طرح ناقص

ليه جنين الحب فينا

لسه ناقص ايد و رجل

100سونار

علشان نأكد إنه حي

نبضه بياكد حياته

بس بانس

أكسجين إهماله عائق

بعدنا عن بعض خائق

أوردة إحساسنا فيه

فكره متشتت و عابس

بس مش قادر يخائق

حبيل سر الاهتمام  
مش تمام  
مش واصل له  
أو يجوز الحبل يانس  
قلب طفل الحب ميت  
بس فينا  
أو يجوز معادشي حاسس  
باللي بينا  
شل فيه كل الحواس  
يمكن الاحساس مجاش  
جايز انه مكاش جي  
عضم شوقنا للحنان  
ناقصه كالسيوم  
ناقصه فيتامين ب و ك

لما يبقى الأب كافر بالمخاض  
يبقى طرح القلب خاسس  
يبقى نقص العمر فاض  
يبقى لسه معادش كاف  
تلقى صلب الحب ناقص  
100 دراع من ألف صم  
يبقى امشيح المشاعر  
ناقصه جين مش ناقصه شاعر  
ناقصه أم

## ثورة الشك

الحكاية واضحة جدا  
مش ذكاء من حد عاوزه  
لما سعرك يبقى عالي  
فجأة ترخص يبقى لخص  
الحكاية مش مزاوله  
أصل معنى الحب دولة  
و انت ريس ع المشاعر  
لما تلقى الشعب قلبك  
قالك ارحل يبقى أفضل  
ان يبقى الحل منك  
والحكومة رغم ذلك  
لسه قال بتقول كذلك

لسه بتقول لك مداوله

ارحل اولى

خلي فيه ذرة كرامه

## محاكمه

يا حضرة القاضي اللي حاكم

و كل حكمه منتهي

واقف قصادك متهم

و دي تهمة

مخلص قوي

شاقق حيطان القهر

متحني لكن حنته

حبة وجع

شارب مرار الصبر

مسكرش و وقع

مايل قوي ع الناحيتين

و لا عمره شاف الشوق بدع

يا حضرة القاضي اللي ظالم كلما

رسمت حروفك  
من شيطان المحكمه  
لا ميزان هنا و لا كفتين  
قاضي المظالم لو حكم  
حكمه على كل المحاكم محكمه  
فماتحكموش من غير دفاع  
و لا تظلموش المتهم  
إذ ربما  
نسمع مرافعه محكمه  
الكل في حبس انفرادي  
انما  
متكلفتين  
و ف وسط ناس  
عايشين بنتنفس صحيح

لكن و مع كل الأسف متكفين  
كل الورق ف المحكمه ملهوش اساس  
غير بالشكوك المبهمه  
و نظرة باهته اتحولت سجن و تابوت  
يأيها الصابر على حكم اتظلم  
اصبر كمان  
هي الضحيه هتشتكي  
لو يسلخوها بحرفهم  
و يعلقوها بشعرهم  
على كل اشطار البيوت ???

## صفحة قلبه

وصفحة قلبه مطويه  
و عايشه اللحظة مجروحه  
عايشها هجر و قسيه  
و بتنهذ تقولش دي نار  
و يتنهذ برود جبار  
و حسه مشاعري كتلة نار  
و هو مشاعره مش ليا  
و دمع عيوني ما فارقتي  
و هو الضحكه مالیه الدار  
تكونش دي دعوة صايباني !  
و عين ماناس ملزمانى  
و حد عاملى كوديه و زار  
و داعي عليا ليل و نهار  
أشوف المر فى وصله

و اعيش بالحيرة و الأفكار  
يا ناس لو حد حاسدني  
أمانه يحل عن فكري  
دا منه شبت من بدري  
و دليلي احتار  
و قال فاكريني فرحانه  
و جوه الفرح سهرانه  
و هم. القلب بيتني  
علي الاذكار مشتتني  
و عين الناس ما سيياني  
عيوني الحلوه دبلها  
و جوه القلب تب لها  
و يفرح لما أقول ياااني  
فأرجوكم ..

بلاش حاسدين  
و خلوا الالهه في الوجدان  
تسمي عليه ليوم الدين

## مصباح علاء الدين

و في الضلمه

لاقيت علاءالدين بمصباحه  
في لحظه خفت أنا منه  
لكني لاقيتني بتقرب  
و مديت أيدي و لمستّه  
طلعلي جني من جوه  
وقال شبيكي لبيكي  
بأيه أمرك ألبكي  
رميت فانوسي من إيدي  
جريت بقوتي أهرب  
لكني لاقيتني جواته  
شاورلي أفقي  
وقفته ومد إيده لملمني  
و قال لي كده خايفه  
دا أنا الحلم اللي تتمني

قوليلي و أمري ياللي  
نزعتي مني دقاتي  
سكت لحظه من رعبى  
و قلت بصوت مهوش واعي  
كفايه لمستك إيدي  
دي كات أحلامي و زياده  
و لما الرعب راح مني  
قلت أقول و أمني  
طلبت الوصل م الجني  
طلع أحلام في منامي  
وفنجان قهوتي سطلني  
وتبت أشرب قهوة قبل ما انام  
عشان بتلعبط الأحلام  
و بتعيشني فا لأوهام

و تاخذ مني أيامي  
وبترجعني 100مئة ألف مليون عام

## لما أموت

لما أموت ...

غسلوني بماء وضوءى

و أرسموا ف جبيني

سجادة الصلاة

وأبقوا حطوا ياناس نقابي

تحت راسي

و كفنوني و أعذروني ...

لو ف يوم زدت ف شجوني

و إفهموني ....

النقاب ماكانش صوره للعيون

النقاب ماكانش دعوة للمجون

النقاب ماكانش رغبة ف الجنون

عمر ديني ما كان له صورة

عمر ديني ما كان ظنون

ديني رسمه جوه قلبي

( إيماني بيه أقوى الحصون )

مش بكلمه هرد ديني  
مش ببيشه هغمي عيني  
مش هاكون ضلما سبيلي  
مش هاسلم للشيطان أبدا وداني  
مش هاعاني ..  
ديني في القلب اترسم  
مش بالنقاب  
ديني بالحب انكتب  
فوق في السما  
علو السحاب  
ديني حافظ ف الكتاب  
حق اللي حاضر و اللي غاب  
ديني عمره ما كان هوي  
ديني للمعلول دوا

ديني عمره ما كان رموز  
ديني عمره ما كان شعار  
ديني عالي في السما  
لما أموت  
غسلوني و رتلوا  
فوق راسي سورة الملك كامله  
أمسحوا من جوه عيني  
دمعه من سوء المعامله  
و أعدلوني و فكروني  
ان ربي هو واحد  
و ان ديني بردووو واحد  
و الحبيب المصطفى هو رسولي  
تمموا لي كمان طهوري  
قولوا عني كلام كويس

بالمحبه لفلفوني  
وأنتوا ماشيين ف الجنازة  
إنكروا رب العباد  
قولوا للي مكانش يوم يعرف جهاد  
ان قلبي ما كان له زاد  
إلا نور المولي بس  
هو ده اللي ف قلبي ساد  
لما أموووت .....

## كشف حساب

القرار اللس أخذته بانسحابي من حياتك،،  
كان قراري  
بعترلك ....

للأسف انت مش

عارف تحب \*

القرار بالانسحاب ،،،

كان قرار مليون عذاب \*

للي يفهم ان بين ضلوعنا قلب \*

الربيع وياك خريف ، النجوم وياك سحاب \*\*

انت معملتش حساب \*\*

ان صبري معاك نفذ وان ده وقت الحساب \*\*

الحضور دايمًا غياب \*

حتي نار البعد عنك خلي نار التلج داب\*\*\*

ذكرياتك مؤلمة ،، حتي لما رخصت عندك ،،،

رخصي ليك كان من غلاك \*

تنهيدتك ناالر بتكوي قتلت الأحلام معاك \*\*

لمسة الإيد ال عاليه ، نظرة العين ال عاليه ،

كلمة الحب ال لاهيه

خلت القلب انجرح من نار جفاك \*\*

دمعة العين ال باتت جوه قلبي بتشتكك ،،

وحدة القلب ال فاقت كل احساس الألم ..

من حبي ليك \*

والليالي ال نسيته والشموس ال محيتها

والجراح ال قاسيتها ضيعت منك حلاك \*\*

حاسس الاله في كلامي ، شايف الدموع نغم \*\*

، يال كنت ف قلبي غالي ورخصك حبر القلم \*

انتهي وقت الجدل ،، والكلام من غير معالم \*

كنت أغلي من الحياة وربنا هو ال عالم \*

كنت ليك دايمًا مسالم \*

كنت طير من غير جناح ويا قلبك انظلم\*\*\*

القرار كان بالغياب واشتكت مني العلل ،،،،،

انسحابي شيء أكيد رحمة مني للقلم

## صحيح إنسان

منيش رسام

لكن برسم بريشة

القهر لوحاتي

و مش نحات

لكن بنحت  
جبال الصبر  
برفاتي  
صحيح انسان  
و بينادوا كده باسمي  
صحيح عايش  
و شايف جسمي  
و شايفني  
لكن مدفون  
و ليل القبر ده حارسني  
أنا الانسان  
لكني جنس تاالني أكيد  
مادام الأكل بالمواعيد  
ما دام محروم من الفرحة

في ليلة عيد  
ما دام الهدمه موجوده  
ما دام اللقمة محرومه  
ما دام الاسم في المواليد  
و أنا ميت  
ما دمت في فقري  
و مبيت  
ما دمت لقيتني  
بتحسر و تتقصر  
ساعات العمر  
ما دام الجسم عزاني  
في عز البرد  
ما دام الالهه محرمه  
دموعها الخد

ما دمت بعيش بأحلامي  
في بيت خاوي  
يطلع عليه نهاري  
يكووون اتهد

## كنت

كنت بتخبيني منهم  
كنت بجري اتخبى فيك  
كنت لما الدنيا تقسى  
اجي و اتشوق اليك  
كنت بتحلي الليالي

كنت انام صورتك ف بالي  
كنت بحسب عمري بيك  
كام سنه دلوقت عدوا  
غايبه عني شמוש عينيك  
عارفه هتقول مش سنين  
بس ثانيه ف بعدي عنك  
تتحسب ف اليوم كتير  
كل ذنبي اني باغير  
هي غيرتي تخلي حيرتي  
تقتل الشوق و الحنين  
حتى لون الشمس باهت  
نور نجوم الليل حزين  
كل عقرب للثواني  
يلتفت للساعه تاني

ينده الاشواق تعالي  
ردت الاحلام بعاني  
انت ممكن تنسى جايز  
بس قلبك  
ليه بينسى الخوف عليك  
معالي اللي غايب  
عن العين و فيا  
بنبه سعادتك بان الاسيه  
اللي ظاهرة لجنابك  
ماهيش طبع ليا  
ويمكن عنادي  
يكون ف اجتنابي  
لتمثيل فؤادي لدور الضحيه  
لذلك بنوّه

بلاش تبقى عادي  
عشان م البدايه  
انا مش عاديه  
و لو كنت غاوي  
غرام الجواري  
بديت ليه الحكايه  
بملكه عتية ؟؟؟؟

## الزمن

انا كل ما اضحك للزمن  
يدينى ضهره  
رخص ف عمرى  
رغم انا عليت ف سعره  
و ادادى دايمًا حسرتى  
فيزيد ف قهره

غلبت اصالح دنيتى

وتضحك عليا

ازيد و اكمل سكتى

و تزيد قسيه

احايل الليل الطويل

يقصر شويه

و ادارى دمعه مكحله

رمشى و عينيا

و قلت الاغى الرزق

يمكن يهنى حالى

لاقيت شقوق البخت

بتلبخ قبالى

ضحكت ضحكه مسمعه

م الغلب روحى مدمعه

و قالوا آل راجل جدع  
له سيظ و مال  
و بختى شايفه بينحنى  
على كوم عيال  
خرجت على قوتى  
و انا بقى حالى حال  
بكيت و غالى ف المثل  
دمع الرجال  
يا رب رافع شكوتى  
و انا قلبى خال  
لا ليا عم انا هشتكى  
و لا ليا خال  
لو راضى حالى و بلوتى  
انا قلبى راضى

مشغول بذكرك يا معينى  
و ليا قاضى  
انا كل ما اضحك ضحكى  
تبكى ف عيونى  
طريقى شايفه بيبتدى  
و الهم كاتب اخرتى  
لا شغله راضيه تنقضى  
و لا قرش باقى  
حفيت على كل السكك  
مش لاقى مرسى  
و كل ما ابعت شكوتى  
يقولوا لى انسى  
لا واسطه ليا تمدنى  
و لا ايد تدادى

يا رب عالم شدنى  
من بين ايديهم مدنى  
دى قلوب بتقسى  
رغيفى حاف غمسته انا  
و عايش و قابل  
هيجرى ايه  
لو بختى انا للفرح قابل  
انا كل ما اضحك للزمن  
يدينى ضهره  
و اعلى تمنه ف السما  
فيزيد ف قهره

## مستئين

طب هما نسيوا.؟؟؟

لو كانوا نسيوا ! ما تفكروهم

علينا قسيوا!! ما تحننوهم ..

طب حد يسأل .. و لو بكلمه

طب وصلوا لهم منا السلام

من غير كلام

بعينكوا مره و بحيره مره

و طمنوهم..  
إن السهر عمره ما كان  
إلا لعينيهم  
طب غيروهم و قولوا عناا  
بعادكوا خلاا ساعاتكوا غاليه  
و الدنيا خاليه  
من لحظة حانيه تجمعا بيكوا  
طب فكروهم ..  
يجوز فراقناااا قسا القلوب ..  
يعني يادوب بتمر ثانيه  
ف غيابكوا ادوب طب كلموهم  
يقصروووا ليل السهررر  
يصالحوا بينااا نور القمررر ..  
مستنيين ..

مش اقول كثير  
لكن هغمض كده طرف عين  
يطلع نهاار فوق الجبين  
مستنيينكو اااا .. مستنيين ..  
مستنيين ..

## جهاد تاني

و من تاني  
هعلم قلبي يستغنى  
و اكون اغنى من الأول  
ما انا اللي عملت افراحي  
ديار بيكم  
و كنتوا تسافروا فناجيكم  
بعدتوا بروحي و انا جيكم  
ف سويت الامل بحري

و خطيت له شطوط للبر

و انا اللي عملت من رمشي

هبوب نسمة ف عز الحر

انا اللي عملت من روحي

سفينة نوح

و حلفت الألم ما يبوح

انا اللي سقيتكوا من دمي

شفا مني و حلا للمر

انا اللي عملت من قلبي سكن ليكم

و انا اللي عملت م الشريان

خيطان الصوف تدفيكم

و خبيت الكبد فيكم

و خيظته حجاب م القر

انا اللي قسمت ع القسمة

قسم م الحر  
و انا اللي حلفت ع الجدران  
ما تنطق غير لمعانيكم  
و انا اللي طرحت م الأحزان  
على جراحي عشان ما يخف معاليكم  
انا اللي جمعت  
من إسمي حروف الجر  
و انا اللي ضربت احساسي  
و دربته .. ما يوم يتغر  
و انا اللي كفيت على جبيني زعل ياما  
و انا اللي مشيت باوجاعكم  
انا اللي خصمت من عمري و بدى لكم  
و كنت تبدلوا ف شوقكم  
و عمري ما شفت انا بديلكم

و كنت بمووووت و يرضيكم

انا اللي قاسيت

عشان ما يمس احساسكم

ف يوم و لا شر

## القصيدة

القصيدة

عاوزة تشرب

مننا شوية حنان

عاوزة حبه من الشقاوه

عاوزة قنطار م الجنان

القصيده

عاوزة تفجير انتحاري

عاوزة تسجيل ف العقاري

عاوزة تهرب من قراري

عاوزة توصل للعنان

القصيده

عاوزة منك توب مخلط

حته من صوف الحياه

خيظ من الموصول ب آه

سوسته من قلب النجاه

جيب علي الحب ال كان

القصيدة.

طالبه رحمه

مقصله تخلص جراحها

ينكتب من نيل حروفها

ألف لااا

القصيدة

شايفه منا إننا كنا و هنا

و اما يبقي الجرح سنه

الصلا تجوز ع ال خان

القصيدة ..

مش إهانته

و لا يبقي الدمع عانه

تتسطل منها الخيانه

ما احنا مش طالبين إعانه

إحنا طالبين الأمان

القصيده.

جه آخرها

كترت فالله يعينها

حددت آخر مصيرها

إنه حي علي الإيمان

## اتنين توائم

إحنا زي إتنين توائم  
رغم كنا ف اختلاف  
الملاح هي هي  
حتي شعرك .. حرف قلمك .. خط سطر  
لون عينيه  
إحنا كنا سبع سنابل  
دوبنا في سنينها العجاف  
تزرع النبض ال فيك  
ينتفض عندي الوريد  
إحنا قصه تانيه خالص

إحنا لون ف الشوق جديد

تفتكر؟؟

بسمع كلامي!

بس صوتك ليه ف وداني!!؟

يعني انا هو ال ساكت!

و لا حسك ده .. ناداني!

شايفه إسمي ليه ف حروفك!

يعني هما صحيح توائم

و لا انا مش واخده بالي

طيب إسمع.. شوف كده.. ركز شويه

هو.. هو نفس صوتك

بس إحساسه اللي غالي نادي تاتي

قول حروف إسمي بهواده

يعني مش لازم لإسمي

تنطقه و بحس عالي  
اصلي مش محتاجه احس  
إني اسمع أي حس  
او اميز حرف حالي  
إحنا هنغير معاني  
حتي لو مش ف الكلام  
يعني لما تقول يا هي  
هو ينطق ف ابتسام  
تبتسم فينا الأمانى  
تنتظر لو ألف عام  
كف إيدك لو يعانى  
ينتحر فيا السلام  
إحنا اصل إثنين ف واحد  
إحنا واحد

بس مقسوم بانتظام

## محتاجه أكرهك

فجأه حسيت

إني محتاجه... أكرهك

كل صور الحب صبحت

مش تمام

كلمتين كانوا بالهزار

وضحوا بقية الكلام

إنتقام يمكن... يجوز..

إني أنا كمان مش أنا..

لمسة الإيد ال تجرح

مستحيل.. تصبح هوي

شفت صورة جوه منك

قبل منك

عمر قلبي ما حسها  
فجأه إنتهي...  
كلمتين من غير ما تدري  
شككوني ف المحبه  
ال بقالنا كتير بنكتب عنها  
و ما خفي يا حبيبيتي  
كان أعظم منها  
الخيانه ف الحروف إتشكلت  
ضحكه صفرا ع الشفايف  
غدر قلبك عاد لقصه  
كان هوانا منها خايف  
هو لسه في خفي. ???  
يعني انا خلاص هختفي !!  
يعني حبك كان كلام

و إنتقام  
من حد تاني  
تاني من غدرك هعاني!!  
تاني هتنفس جروح  
و اركب الموجه ال كانت  
عند قلبي تتخطف  
ترسم علي شطوط الفراق  
قلب طائف  
ألوان رسومك حسها  
ف البعد خايف  
أو يجوز  
ف القرب بتلفت و شايف  
ان ألوان الحروف  
بقي لونها باهت

و ليه يترنح المعني

و ابات سكران

من الهنه

و تحضن كلمتي سكوني

و انا ساكته لكن سامعه

و ليه شيفاني مش شايفه

و ليه خايفه

و حد السيف علي رقبتي

بيسلخ فيا شرياني

و يقتل حبة البركه

و يعملني حديد صوان

بيتخاق مع روجي

عشان دامعه

و تدمع دمعتي مني

فتقفاني

بترابيس الهوي الخرفان

ما هو السكر ال ف الكلمه

سقيته حبتين صحيان

فحرف ف الحروف حبه

و خلاني يا دوب حبه

تدوب ف الأرض ما تنبت

غير التوهان

بلاش توهه

انا ف السطر بتمرغ

و عيني شكلها مزوغ

فتكتب حرف من سكه

و تمسح حرف من إنسان

فا ادوخ تاني

و القاني  
لا انا صاحيه  
و لا نايمه  
لكني ف الخدر قايمه  
بصحي الدنيا  
تتمزع  
و تتوزع  
و فجأه. ..  
أصحي ...كأنه ما كان

## هوى كداب

و مش هقبل

تكون كداب

و تتمايل علي غصون الهوى

تهفهف

و بتفررف ف عز الحر نسمايه

بيطلع منها نار قايدة

مفيش فايدة

بتملكني

سما والعه بمليون نجم يحرمني

ساعات الفكر مرتاحه

مفيش راحه

و انا شايفه هواك قبلي

و انا بحري

و لا بحري بيغرق فيه  
حروف شاطت  
و لا شطت من الكدبه  
خلاص أبريل  
بقي ذكرى  
فاليه الكذب احساسه بقطم الضهر  
قبلنا بحكم ايامه  
و حكم الدهر  
و ولي العصر من ضهره  
فصلي له صلاة القهر  
و سمينا علي الفكرة  
و علي فكره  
النهارده سماح  
و بكره امال بتتلاقي

عشان بات الإيمان مرتاح  
بيخلق م الحنين ماضي  
و يتشعلق ف قلبي مني  
و انا منايا يكون ف القلب  
لو شاهد علي جبيني  
يصحيني  
يكون صادق  
دليله الطهر  
مفيش أحباب بتتقابل  
سراب ف سراب  
اكيد فتح الهوي سنه  
فبدل ف الغرام سنه  
و بعد ما كنت ليك الغرض  
صبحت ف الهوي السنه

يجوز كنا

يجوز هنا

يجوز حبينا بعض بجد

يجوز كنا ف وقت الجد

بنحرق حبنا ما بينا

لكن واضح بدون و لا شك

هوى قلبك

هوى كداب

## محتوى الكتاب

2	..... بطاقة الكتاب
3	..... ضغط عالي .. صفة بالعامية المصرية
4	..... إهداء
5	..... ضغط عالي
12	..... حب يتيم
16	..... زهايمر
19	..... مدد
22	..... مش عيونى
25	..... الكل خان
27	..... كل مره
28	..... مجبور
29	..... بوصيكي
34	..... آخر قرار
38	..... ماتقولش أنا بعت
40	..... ذنب مين
44	..... شريان العند
48	..... طرح ناقص
51	..... ثورة الشك
53	..... محاكمة

56	.....	صفحة قلبه
59	.....	مصباح علاء الدين
62	.....	لما اموت
66	.....	كشف حساب
69	.....	صحيح انسان
72	.....	كنت
75	.....	الزمن
80	.....	مستئين
82	.....	جهاد تانى
85	.....	القصيدة
88	.....	انتين توائم
91	.....	محتاجه أكرهك
97	.....	هوى كداب
102	.....	محتوى الكتاب